

Tús eolais ar an Líonra na hÉireann um Litearthacht na Meán

Is líonra páirtithe leasmhara atá i Líonra na hÉireann um Litearthacht na Meán a oibríonn le chéile chun litearthacht sna meáin a chur chun cinn ar fud na hÉireann.

Creidimid gur rud lárnach é litearthacht sna meáin chun na scileanna agus an t-eolas a thabhairt do dhaoine le tuiscint a fháil ar an gcaoi a n-oibríonn na meáin sa timpeallacht seo atá ag athrú, chun diancheistiú a dhéanamh ar chruinneas na faisnéise, chun deireadh a chur le léiriú míchothrom agus míchruinn, chun dúshlán a thabhairt do thuairimí antoisceacha agus, sa deireadh thiar, roghanna meán níos fearr a dhéanamh.

Tá cúig sprioc i gceist le Litearthacht na Meán in Éirinn:

1. Gach gné de litearthacht sna meáin a chur chun cinn ar fud na hÉireann.
2. Cumarsáid a dhéanamh trí imeachtaí, gníomhaíochtaí duine ar dhuine, agus bealaí ar líne chun cás-staidéir dea-chleachtas agus tionscadail a thaispeáint agus feachtas a ardú maidir leis na deiseanna agus na rioscaí a thagann chun cinn ó ardáin agus seirbhísí nua inneachair.
3. Bonn eolais maidir le litearthacht sna meáin a chruthú agus a chothabháil ar fud na hearnála, lena n-áirítear cartlann taighde de litearthacht sna meáin agus bunachar sonraí de thionscadail agus acmhainní reatha.
4. Bearnaí ó thaobh soláthair a shainnint, moltaí a dhéanamh maidir leis an gcaoi dul i ngleic le bearnaí i soláthar agus deiseanna féideartha i gcomhair maoinithe a aithint.
5. Daoine, eagraíochtaí agus tionscadail a nascadh chun plé a éascú agus forbairt comhpháirtíochtaí nua a chothú agus tionscadail inbhuanaithe a bhaineann le litearthacht sna meáin.

Ballraíocht

Is féidir le daoine aonair agus eagraíochtaí atá ag obair chun aon cheann de na torthaí atá aibhsithe i mbeartas an BAI maidir le Litearthacht na Meán a bhaint amach leas a bhaint as Líonra na hÉireann um Litearthacht na Meán. Is cuma faoi aois, inscne, stádas pósta, a bheith mar bhall den lucht siúil, stádas teaghlaigh, claonadh gnéis, míchumas, cine, náisiúntacht, eitneachas nó reiligiún.


Tá ballraíocht saor in aisce ach beifear ag súil go roinnfidh na baill scileanna, eolas, taithí agus acmhainní i dtaca le litearthacht sna meáin le baill eile.

D'fhonn a bheith mar bhaill, ní mór do dhaoine aonair nó d'eagraíochtaí an fhoirm bhallraíochta a líonadh isteach agus í a sheoladh ar ais ar ríomhphost chuig reception@bai.ie.

An Grúpa Stiúrtha Eatramhach

Chun na scileanna agus an t-eolas ábhartha a thabhairt le chéile, a theastaíonn chun an treoir straitéiseach a leagan síos le haghaidh an Líonra agus chun treoir agus tacaíocht a thabhairt le haghaidh gníomhaíochtaí an Líonra, tá cuireadh tugtha ag an BAI do 12 bhall den Líonra nuabhunaithe dul isteach sa Ghrúpa Stiúrtha Eatramhach.

Léaráid 1: An Grúpa Stiúrtha Eatramhach



Mar a thaispeántar i Léaráid 1 thuas, déantar ionadaíocht ar na príomhearnálacha a bhfuil baint acu le litearthacht sna meáin a chur chun cinn in Éirinn agus meastar go dtiocfaidh athrú de réir a chéile ar chomhdhéanamh an ghrúpa sin mar léiriú ar riachtanais athraithe an líonra. Meastar go n-athrófar triúr nó ceathrar ball ar bhonn bliantúil agus toghfar an Cathaoirleach ar bhonn bliantúil ag tosú sa ráithe deiridh de 2018.


Tionóladh an chéad chruinniú den Ghrúpa Stiúrtha Eatramhach an 5 Deireadh Fómhair 2017 agus comhaontaíodh clár uailmhianach gníomhaíochtaí le haghaidh an chéad dá bhliain lena n-áirítear:

- Grúpaí oibre a bhunú chun tascanna agus gníomhaíochtaí sonracha a chur i gcrích.
- Iniúchadh a dhéanamh ar thaighde, ar thionscadail agus ar acmhainní reatha i litearthacht sna meáin d'fhonn bunachar sonraí inbhuanaithe agus soláimhsithe a chruthú.
- Cumarsáid iomchuí agus áisiúil a chruthú do bhaill lena n-áirítear ceithre nuachtlitir ráithiúla, agus meáin shóisialta iomchuí.
- Dhá dheis ar a laghad a chruthú do bhaill chun bualadh le chéile chun tionscadail a thaispeáint agus faisnéis a roinnt.
- An bhallaíocht a mhéadú agus díriú go gníomhach ar earnálacha nach bhfuil dóthain ionadaíochta á déanamh orthu.

Grúpaí Oibre

Cé go bhfuil sé mar chúram ar an nGrúpa Stiúrtha Eatramhach cinní straitéiseacha a dhéanamh don Líonra, beidh líon beag Grúpaí Oibre freagrach as gníomhaíochtaí an Líonra a fhorbairt, agus beidh tacaíocht acu ó fhoireann bheag chomhordaithe, á maoiniú ag an BAI. Feictear é seo i Léaráid 2 thíos.

Léaráid 2: Forbhreathnú ar an Líonra



Le haghaidh Bliain a hAon, beidh trí Ghrúpa Oibre bunaithe, agus beidh ar gach ceann acu dul i ngleic le cuspóir sonracha. Is iad sin:

- Díreoidh an Grúpa Oibre Rannpháirtíochta ar thrí réimse:
 1. Cumarsáid shoiléir, éifeachtach agus chomhleanúnach a chothú ar fud an Líonra.
 2. Dhá imeacht ar a laghad ar fud an Líonra a phleanáil, a léiriú agus a chur chun cinn thar thréimhse 12 mhí.
 3. An réiteach is fearr a mholadh chun bunachar sonraí náisiúnta i litearthacht sna meáin a líonadh isteach agus a bhainistiú.

- Díreoidh an Grúpa Oibre Taighde ar dhá réimse:-
 1. Staidéir thaighde reatha ar litearthacht sna meáin a shainaitheint agus
 2. Faisnéis a bhailiú maidir leo a chuirfear sa bhunachar sonraí náisiúnta ar litearthacht sna meáin.

- Díreoidh an Grúpa Oibre Tionscadal agus Acmhainní ar dhá réimse:-
 1. Tionscadail agus acmhainní reatha i litearthacht sna meáin a shainaitheint agus
 2. Faisnéis a bhailiú maidir leo a chuirfear sa bhunachar sonraí náisiúnta ar litearthacht sna meáin.